



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tir_yimiyim

yt tir yimiyim

TAPAK 7



BCCI-i Shubman Gill dang senchi achi



Israel-i Lebanon amakba ajanga jembishinü amajok akumtsü: Pezeshkian

VOL. XXIII ISSUE NO. 176 (ADOK 176) DIMAPUR ROGONÜ (FRIDAY) RONGCHII (APRIL) 10, 2026

₹ 5.00

Assam nung vote agütsür noklang nung shilem 85.13 liasü

Guwahati, Rongchii/April 09

(Agencies): Assam nung April 9, 2026 nü Assembly elections agiba mapang tzüingsang mejungi liasü, saka nüburttem jenti arua pei temeden vote agütsüogo.

Voting ya nikongdang 5:00 ako nung tembang, saka polling stations kar nungbo nikongdang tashi vote agütsütsü aika adenshia liasü, anungji voters dak tejangraba aliba ajitet. Election Commission of India-i nikongdang 7:00 ako tashinung vote agütsür noklang nung shilem 85.13 liasü ta ashi, koba 2021 Assembly elections mapang shilem 82.04 aliba alema nüburttemi shilem tali agiba sayuogo.

Constituencies kar nung alakteta nüburttemi tejangraba nung shilem agi, talisa lower Assam aser central districts tem nung liasü. Dalgaoon (94.57%), Jaleshwar (94.31%), Srijangram (94.33%), Mankachar (94.08%), aser Golakganj (93.42%), item nung timtibai vote agütsü.

Iba sülen Laharighat (93.44%), Chenga (93.38%), aser Goalpara East (92.79%) liasü.

Vote timba agütsüba ya Dhubri aser Goalpara region (Golakganj, Jaleshwar, Mankachar, Goalpara East) BARPETA belt (Chenga, Pakabebari, Mandia) Darrang-Morigaon stretch (Dalgaoon, Laharighat) nung liasü.

Item tesemtem nung teti amai shilem 90 alemer.

Guwahati constituency tem dangar memenepi liasü.

Guwahati region kübok Dimoria (80.52%), Dispur (73.98%), Guwahati Central (75.23%), Jalukbari (80.83%), New Guwahati (71.27%) liasü.

Assam nung yimyak yimsüngtem dang nungi jila aser yimti tulutem nung vote agütsür shilem tajemba liasü.

Nikongdang 1:00 ako tashinung vote agütsür shilem 59.63 liasü, aser district aika nung tzüinglu aruaka nüburttem maneni vote agütsütsü adenshi.

Voters temi development, yimsüsüba yimya aser employment asoshi bilema vote agütsüba lemsatempa liasü aser aikati democratic yimya nung pei teinyaktsü tongtipang ka ta angateta vote agütsür ta ashi. Assam nung polling centres aika nung benjong ama vote agütsü.

Tesem kar nung mepetmesü adokba, EVM mapa junga meinyakba osangtem liasü.

Sontipur district kübok Naduar constituency nung polling ketdangsur ka duty nung asü, Golaghat nung party balala tsüingta raratep, saka security personnel temi yakta azüok.

Nikongdang 1:00 ako tashinung Tamulpur, Sivasagar aser Golaghat nung election dak sendakba mepetmesü mechi nisung toku apu ta police temi ashi. Ajisüaka item yagi vote agütsüba nung timtem balaka magütsü ta ketdangsur temi ashi.

Taküm Assam Assembly elections ya constituency ajunga (126) nung agia liasü, kong candidates 722 aser vote agütsür crore 2.49 dak tema liasü.

Koridang by-election tesünep nung tembangogo Voters noklang nung 82.21%-i shilem agi



Mokokchung district kübok 28 Koridang Assembly Constituency nung April 9, 2026 nü by-election agidang polling station nung nüburttem vote agütsütsü nokdaka aliba noksa nung angur.

Mokokchung, 9th April

(TYO): Ajaki yongyaseta ataba 28-Koridang Assembly Constituency by-election 9th April, 2026 nü lendong timtem atalokba osang kecha makai tesünep nung tiptema tembangogo. Voters ajak senteper 22000 dak tali lir, iba nungji noklang shilem nung 82.21%-i shilem agia liasü. 4th April, 2026 nü postal ballot agiogo aser iba nungji nisung noklang asem tera majungi shilem agiba angur.

Koridang constituency kübok polling station ajak senteper 30 lir. Polling Station 30 rongnung 17 bo lendong (critical) nung liasü saka tia junga item polling station kecha nunga timtem atalokba osang maliasü.

Candidate par trok (6) lir - Daochier I. Imchen (BJP), T. Chalukumba Ao (INC), I. Abenjang (NPP) aser Independent nungi par asem - Imchatoba Imchen, Toshikaba Major (Retd) aser Imtiwapang.

Par trok rongnung shiba adoktsü'ar ajibo 5th May, 2026 nü ang jangjatsü kechiaser inüjiang vote azüngtsü.

Iba osangbeneri Mokokchung Sr. SP dang, "Election agiba sülen (post-poll) lendong ataloktsü chance lir mali?" ta metetnüa asüngdangdang, yim ana nung ataloktsü amai bilemer, ta ashi.

Tanü polling station kar nung voting machine mapa junga meinyakba ajanga tera menur tenzüka, Alichen polling station ana nung tetsür kari tangar indang voter slip aika bener senzüa lia parnokji polling matem tashi tesem kar nung pur ayuba, Alichen nungsa vote malirtem kar Mokokchung town len nungi gari 20 shi ait, saka police-temi parnokji meintoka liasü, ta Mokokchung Sr. SP-isa tanü atalokba kar lemsatep.

Tawa Longkhum nung lendong ataloka nisung ka asüba dak sentakba nung parnok 18 pua lir aser iba atalokba tsüngsü

tejangjaba bushisüngdangtsü asoshi SIT ka shimogo, aser Mangmetong yimyak telok kadi telok ka amakdang tesama ajuruba dak sentakba nung nisung kar pua lir aser ibajia maneni bushisüngdangdar, ta Sr. SP-isa metetdaktüsü.

Koridang by-election tiptema aser tesünep nung tembangtetsüsa shirnokisa amalitepa yaritepogo aser pei tata shilem shitak inyakogo, parnok ajak dang pelar, ta Mokokchung Deputy Commissioner, Ajit Kumar Verma IAS-i metetdaktüsü.

Koridang ya lendong atalokba constituency ka lir aser tanpa by-election ya-a sashi-sashia liogo, aji oda, election yimjung nung tembangtsü asoshi akokba tashi meranga inyakogo, saka tia maka nisung taküm ka samaba den tesem kar nung raraba atalokogo, ta Mokokchung Sr. SP-i sasaba olen ka den election tesünep nung agitettsüsa amaliteper ajak dang pelaba lemsatep.

State sorkari Foothill Road phase-II ano magizük: Nagaland PWD

Dimapur, Rongchii/April 09

(TYO): Nagaland Foothill Road Coordination Committee (NFHRCC) ajanga tekeraba nung work orders agütsütsü akhangba mapang, Foothill Road project phase-II atema state sorkari temelaba agüja mali, ta Nagaland Public Works Department (Roads & Bridges)-i jangjatsüogo.

Brehostibarnü telangzüba ka agütsüba nung, 'formal approval' sülen ang phase tanabuba atema work orders ya agütsütetsü, koba tang tashi maru, ta department-i Brehostibarnü ashi.

Phase-II atema administrative yimya nung sen crore 400 mela agizükogo ta jembiba dak sendakba nung, sorkari iba ama administrative approval agütsüba mejangja, ta department-i ashi.

Work orders magütsüra April 15 nungi PWD (R&B) Dimapur division office shibangtsütsü ta NFHRCC ajanga tekumdangtsü shir lia iba sangdong ya agütsü.

Stakeholders temi 'no objection certificates' (NOCs) agütsüogo, saka item ya metres 10 nungi 12 atema dang lir, sama standard two-lane lenmang atema carriageway, shoulders, drainage aser utility corridors atema Right of Way (RoW) tuluba nüngdaker, ta ashi.

Foothill Road ya four lanes kumdahtsütsü atema jembishinüba ya Centre nungi 'long-term funding' teyari lenmang bushitsü atema lir, kechiaser iba project ya tulu aser state rongsen kanga ajema lir ta ashi.

Iba dak sendakba nung

Ministry of Road Transport and Highways (MoRTH) ajanga May 26, 2025 nü osang ka yokba nung RoW metres 30 angati agütsütsü, forest aser environmental clearances amala meshia lir, ta NPWD-i jangjatsü.

Ajisüaka April 7, 2026 nü senden ka amenba sülen aser tensa tia shidak asadanga aser ali kibur temi bilemba asadanger "balanced and practical approach" tajungba ka renem, ta ashi.

RoW metres 15 angati agütsütsü asoshi tang asadanga mapang lir aser ibaji angatettepba sülen MoRTH dangi abentsü ta ashi.

Baghty division nung mapa junga meinyak ta tai tonglokja aliba nung telangzüba agütsüba nung, 'curing period' mabensadang

mining vehicles taret ajanga aoba yong culvert structure ka nung poksaba liasü, ta department-i ashi.

Iba stretch nung Foothill Road ya Doyang ayong tzükum anasa ajanga aor, kong long poksaba aser gari tulu senzüba bulua lir, aser item ya menokdangtetsü, kechiaser item ya yangji aliba nüburttem takum aliba den sendaktepa lir, ta ashi.

Department-i item portions tem yanglushiogo ta ashi.

Detailed Project Reports (DPRs) nung metokmeperi aliba dak sendakba nung, DPRs ya survey agiba mapang 'site conditions' nung ajemdaker yanglu aser mapa inyakba mapang metokmeperi jangjatetba tem nüngdakba technical mera ajanga

bentetogo ta ashi.

JK Construction aser Chabou & Co. densema contractors temi mapa inyakba nung menuba dak sendakba nung, contractors temi application agütsür aser gari tulu senzüba ajanga raksaba aser yanglushitsü nüngdakba amala tensa asadanga sülen April 30, 2026 tashi mapang atsülangtsü mela, ta department-i ashi.

PWD (R&B) minister mapa nungi anentsüba sangdong dak sendakba nung, iba ya tang SASCI kübok sanction süa aliba sen 148.50 crore kübok inyakba mapa indang lir aser Foothill Road project ajunga indang masü ta jangjashitsü.

Iba project nung melaba aser nüngdakba dak alaka 'deductions' kecha mali ta ashi.

Chumoukedima nung consultative workshop ka ayongzüka agi



DC Chumoukedima, Polan John, NCS lenisüba nung Workshop lapokba sentong agiba noksa nung angur.

Dimapur, Rongchii/April 9 (TYO): Chumoukedima Deputy Commissioner Office-i ayongzüka 'Viksit Nagaland @2047' dak sendakba nung April 9 nü District Stakeholder Consultative Workshop ka DC's Conference Hall nung agiogo.

Jenang ajak nung stakeholder tem nungi shisatsü agia state atema mapang talangka asoshi vision document ka yanglutsü nükjidong nung iba sentong ayongzüka agiogo.

Workshop lapokba sentong nung o jembiba mapang Chumoukedima Deputy Commissioner, Polan John, NCS-i lokti pela agizük, aser 'Viksit Nagaland @ 2047' vision indang tongmelang agia metetdaksü. Pai ashiba agi, iba ya India nüjiso ngur küm 100 ajungba mapang Nagaland-a renloker lidaktsütsü atema sentong yanglua ayutsü atema lir.

Paisa, 2047 küm tashi nung state terenlok atema holistic aser inclusive vision document ka renemtsü asoshi tang inyaka aliba nung iba workshop ya-a shilem ka lir, ta ashi. Pai, iba sensaksem sentong nükjidongji, stakeholder tem tebilemba balala angadangtsü, sectoral

assessment agitsü, ken o tongtibangtem jangja ayutsü aser shinga tesülen metoktsütsü atema lokti nung tekübokba jenjang nung alirtem nüngdak peritsütsü asoshi lir, ta ashi.

DC-i ashiba agi, sensaksem ya rongsenketzüng terenlok, lokti libaren terenlok, tzü-mopung wazüka ayutsü, infrastructure terenlok aser yimsüsüba aser rijutem akangshitsüba dak rangloker agitsü.

Pai sentong nung shilem agirtem dang data tapet, ken o bushisüngdangbatem aser structured input tem renemer arutsü ayongzüka liasü. Paisa, temelenshi tongtibangtem lepa reprangshitsü, kechi agi terenlok sota ayur aji asadangtsü aser terenlok agi anünga aliba tesemtem jangjatsü koda tongtibang iba indang lemsatet.

Maneni pai, Nagaland Institute of Transformation (NIoT) nungi team pelashishia agizük aser workshop ayongzüka agiba nung parnoki tongtibang shilem agiba atema tenüngsang agüja liasü.

Sectoral assessment session nung Medical, Social Welfare, Agriculture, PHED, Power, Forest, Employment & Skill

Development, aser Industries & Commerce densema district department balalai parnok inyakyimtem metetdaksü. Presentation tem ya rongsenketzüng terenlok, lokti liba terenlok, tzü mopung wazüka ayutsüba, infrastructure aser governance dak rangloker agüja liasü. Maneni department temi, Chumoukedima district nung tang benoka inyaka aliba flagship schemes tem indang osang agitsü.

Technical session mapang telok balala küma lemsar sensaksem agi, kong shilem agirtemi pei sector nung tetsükdaktsü aser maongkatem indang sensaksema liasü. Iba sesaksem ajanga ngutetbatem mapang tatsüka lir lemsatet aser iba ajanga sector balala tinyaktsü aser inyaknubatem metetdakja liasü.

Iba workshop ya SDO (C) HQ, Shreyansee Jain, IAS-i anküp o jembir tembanga liasü. Anogo ka tepeyong agiba workshop nung district line department aser public sector undertakings, frontline service provider, NGO aser lokti lenirtem adenshia terenlok atema sensaksemogo.

SCERT Director Kevirale den tepila sentong agi



Dimapur, Rongchii/April 9 (TYO): SCERT Director Kevirale-ü Kerhuo den SIEMAT Hall, SCERT Kohima nung tepila sentong ka agiogo.

Küm 33 sorkar tenzükba sülen la ya 2026 küm March ita 31 nü mapa nungi anena liasü.

Iba sentong nung Commissioner & Secretary to the Government of Nagaland Kevileno Angami, Mission Director, Samagra Shiksha Mission Director L. Jamithung Lotha, IAS, Samagra Shiksha nungi ketdangsurtem, Chairperson, Nagaland Board of School Education Rangumbuing Nsarangbe, Department of School Education nungi ketdangsurtem, District Institute of Education

and Training (DIETs) balala nungi Principal tem, All Nagaland DIET Faculty Association ketdangpurtem, tejaokertem aser SCERT, Nagaland staff temi shilem agia liasü.

Sentong nung o jembirtemi mapa toktsüba Director indang nükla, lai bendanga agüja inyakba aser takoktem koba ajanga iba riju terenlok nung teyari tulu agütsüogo, iba indang jembia liasü.

La lenisüba nung department ya lenla balala nung renlokogo, kong shisaluyim nung temaba jenjang atongba, tesayurtem shisaluyim aser infrastructure terenlok densema lir, ta parnokisa ashi. Mapa toktsüba Director-i

lokjemer team ka ama inyaktsü ajungmesoba aser mapa inyakba tesem kanga junga toktsüba atema la indang colleague aser staff temi kanga pelaba lemsatetepa liasü.

Tepila o jembiba mapang Kevirale-ü Kerhuo-i, kümtem tsüngda la nongita yariba aser teka amteper inyakba atema team ajunga dang kanga pelaba lemsatetep. Laisa, ajak dang department tajungba küma renloka yoktsü atema maneni bendanga agüja inyaktsü ajungshia liasü.

Iba sentong ya la nem aküm tetushi agüja aser la mapa tajung asoshi pelaba temaitsü memento tem agütsüba sentong agiba sülen tembanga liasü.

Chumoukedima DPDB senden April 10 nü agitsü

Dimapur, Rongchii/April 9 (TYO): April ita atema Chumoukedima district District Planning and Development Board (DPDB) senden April 10 nü 11 ako nungi tenzüka DC Conference Hall, Chumoukedima nung agitsü, ta

metetdaksüogo. Deputy Commissioner aser DPDB Vice Chairman, Polan John-i, züngsem ajak dang iba senden nung tamakok maludaktsüi jangrabangra arua shilem agitsü mepeshia metetdaksüogo.

Home department-i taruba Census atema tetuyuba agitsü

Dimapur, Rongchii/April 9 (TYO): Home department-i sangdong ka ajanga taruba Census 2027 takok ngua agitsü atema nüburtem dang teka amteper inyaktsü asoshi tetuyuba kar agütsüogo. Census 2027 mezüngbuba shilem, koba House-listing aser Housing Census dak sendaka lir, iba ya Nagaland nung 2026 küm July 1 nü nungi July 30 nü tashi agitsü aser self-enumeration atema 2026 küm June 16 nungi 2027 küm June 30 nü tashi lapoktsütsü.

Population Enumeration (PE) tanabuba shilem ya linük ajunga nung 2027 küm February ita nungi agitsü, aser iba sülen

2027 küm March 1 nungi 5 tashi revisional round agitsü.

Census ya yimdak yimtsüngtem aser jila/kiyong balala nung Housing condition, Amenities & Assets, Demography, Literacy, tamangba yimsü, rongsenketzüng inyakyim, Migration, Fertility dak sendakba nung data primary source lir.

Iba ya policy balala yanglutsü aser nüburtem takok ngua ketdang asütsü atema Central/State/UT sorkar temi amshir. Anungji nüburtemi Census agiba nung teka amteper inyaktsüla aser osang tejangja agütsütsüla, ta kasa sangdong ajanga metetdaksü.



Assam Rifles-i Chieswema Garrison, Kohima District nungi NIEDO kaketshir aser staff 33 Kohima nung Tabitha Enabling Academy (orphanage) semdangi anir oa liasü. Iba academy semdangba mapang kaketshirtemi tanurtem aser staff tem den sensak asem, aser iba ajanga parnok anogoshia inyakyim, tetsükdaktsü ajangshiba aser parnok tejangrabatem angateta liasü. Iba sentong ya senotsü teyari agütsütsü atema dang masü saka tanurtem ajungmesotsü nükjidong nung ayongzüka agiogo.

Kohima nung alirtem dang merekmejung sentong nung shilem agitsü ayongzük

Dimapur, Rongchii/April 9 (TYO): Kohima Deputy Commissioner, B. Henok Buchem, NCS-i April 10 anepdang 7 ako nungi tenzüka Kohima district ajunga nung merekmeju sentong ayongzük agitsü aliba dak sendakba nung tetuyuba kar agütsüogo.

Tzüngluruwa atema district renemshiba mapang iba merekmeju sentong ya kanga tongtibang asütsü, kechiyong iba anogo kilentzütem merekmeta tzü bangdaka ayutsü alibatem merekmettsü aser iba den nüburtem talidak merek mereka toktsütsü.

Kohima jila atema team lenirtemi jana bendenba gari anepalutsü assohi ketdangsurtem den tongteprateptsü. Janatem ya IG Stadium kübok Kohima Municipal Council Waste Dumping Site-i bener oa entoktsü, koba Kohima Municipal Council-i

achaayangtsü.

Kohima nung Ward Councillors aser Colony/Ward Chairmen ajak dang pei kiyong nung alirtem anidena iba sentong nung shilem agidaktsütsü mepeshia metetdaksüogo. KCCI-i, TCP Gate nungi Keziekie tashi nung aliba business establishment tem achaayangtsü.

Sub-division aser yimtsüngtem nung ken o dak sendaka aliba Administrative ketdangsurtem lenisüba nung iba merekmeju sentong agitsü.

Deputy Commissioner-isa, tzüngluruwa mapang tetsükdaktsü balala ajangshiba nungi Kohima jenboa toktsütsü atema iba merkmeju sentong nung lokti-i shilem agitsü koda tongtibang iba indang lemsatetepogo. Anungji senso tajungtem dang tejakdangi arua iba lokti nübu tsüka merekmejuba sentong nung shilem agitsü mepeshia metetdaksüogo.

SÜR KÜM NA BUBA AMUNGER

"Nenok tebelemer aser khu reta abener ajak kü dangi arung aser ni nenok nem anisüingzük agütsüdi." Mathi 11:28

Na onoki pilar küm ana süitemaka, nü temeim anogo shia onok meketbanger alir. Onoki na menguaka, onok den na aliba mapang ajak nung aser onok sarasadem shia meteter. Na onok nuk agi mangutsüsa pilaaka, onok mulungjang nungibo mepilai teti lir.

- Temeim Kinungtsü, Chirnur, Anükapang, Semchirtem aser Kinungertem.



LATE. M. IMKONGLIBA, NCS (RTD) 10/04/2024 - 10/04/2026

Rajnath-i aniba iGoM senden mena West Asia tensa asadang

New Delhi, April 09 (Agencies): Bodhbarnü Defence Minister, Raknath Singh leniba nung informal group of ministers (iGoM) senden amenba sülen parnoki department ajak dang, West Asia dak sendakba tebilemtsü balala koktettsü atema maneni renema liang aser amalitepa inyakang, ta metetdaksü. Rajnath Singh-i X ajanga, linük nung maneni LPG, petrol aser diesel angutsü, aluyimertem atema fertilisers aser nürtem nem nungdakba supplies ajak methitemi agütsütsü atema sorkari inyakdar, ta metetdaksü.

Iba senden nungji iGoM dang, testüba anogo 40 tsüingda tanga linüktem den medemdangra Strait of Hormuz ajanga asenok meyong rong teimba aruogo, ta metetdakja liasü. "Strait of Hormuz ajanga LPG abenba rong 8 nung 340TM bener aruogo, aser ibaji India nungeri nungdakba imports, anogo 11 shi peritsüsa lir," ta iGoM nem metetdaksü. Senden nungjisa 5 kg free trade LPG cylinders shilem 20 lemsükja aliba dang nungi teimba bener arutsü atema inyaksangshiba osang minister tem aser ketdangsertem nem metetdaksü.

Kerala, Assam aser Puducherry nung assembly election agiogo



April 09, 2026 nü Puducherry nung nun temi vote agütsüba sülen vote agütsüba temaitsü sayuba noksa nung angur. Brihostibarnü Puducherry nung assembly elections agiogo aser May 4 nü vote azüngtsü.

New Delhi, Rongchii/April 09 (Agencies): Left sorkar aliba Kerala aser NDA sorkar aliba Assam aser Puducherry nung Brihostibarnü assembly menden 296 atema election agiogo; ano state asem nunga menden pezü atema by election agiogo. 2024 küm Lok Sabha election nung NDA-i takok tulu anguba sülen Jharkhand aser Jammu & Kashmir na dak alaka tanüingba assembly election ajak nung NDA-i takok ngua arur. Brihostibarnü Assam, Kerala aser Puducherry nung

menden 296 atema candidate 1,906-i toktepogo. Assam, Kerala aser Puducherry nung vote agütsütsü temsüa alir crore 5.3 dak tali liasü. 2025 küm Bihar nung SIR exercise agiba sülen election agia liasü, iba sülenbo tang mezüing assembly elections agir. Assam nunga SIR exercise agia liasü ajisüaaka tang National Register of Citizens tagidak asüba agi electoral roll meyanglushi. Tang election agiba states aser Union Territory of Puducherry nung SIR agia

voters aika electoral roll nungi tenüing agienba sülen election agir. Brihostibarnü nikongdang 5:00 ako tashi nung Kerala nung voters shilem 75-i vote agütsü, Assam nung voters shilem 85-i vote agütsü aser Puducherry nung voters shilem 86.92-i vote agütsüogo, ta election ketdangsertemi metetdaksü. Brihostibarnep Ato kilonser Narendra Modi-i nürtem dang, peipei state tarutsü jenjang yanglutsü atema ajaki shilem agia vote agüjang, ta ajungshia liasü.

Women's reservation ozüing atema sorkari draft bill agizükogo

New Delhi, April 09 (Agencies): Women's reservation ozüing yanglushia agizüktsü atema sorkari draft bills agizükogo; iba ozüing kübok 2029 küm nungibo Lok Sabha aser state assemblies nung tetsürtem atema menden shilem 33 shiteta yutsütsü. Cabinet-i agizükba draft bills ji April 16 nü Parliament senden nung benoktsü. April 16 nungi tenzüka temeja Parliament senden amendang sorkari bill asem- Constitution (131st Amendment) Bill, Delimitation Bill aser Union Territories nunga tetsürtem atema-a

menden shiteta yutsütsü atema temeja bill ka benoktsü. Ozüing yanglushibaji ajanga tang Lok Sabha nung menden 543 aliba nungi menden 816 akümtsü aser tetsürtem nem menden 273 shiteta yutsütsü. Lok Sabha aser state assemblies nung tetsürtem atema menden one-third shiteta yutsütsü atema 2023 küm Nari Shakti Vandan Adhinyam (Women Reservation Act) ya agizüka liasü. 2027 küm Census agiba nung ajemdaker delimitation exercise tembangba sülen iba ozüing ya mapa küma benoktsü.

Samrat Chaudhary Bihar CM shimtsüa akok

Patna, April 09 (Agencies): Bihar nung JDU tongti lenir, Nitish Kumar küm 20 shi Chief Minister inyaka aruba sülen pa mapang tembangdar; Hokolbarnü pai Rajya Sabha MP tenangzükba agitsü atema pa New Delhi-i ogo. Pa den külemi Sanjay Jha aser Vijay Kumar Chaudhary nata MP tenangzükba agitsü. Osang angazükba agi, April 14 nü Nitish Kumar-i Chief Minister menden nungi anentsü aser NDA legislative party senden mena chief minister tasen shimtsü. Tang deputy chief minister

teinyakdak, Samrat Chaudhary chief minister shimtsüa akok. Pa Delhi-i oa pai BJP central lenirtem ajurutsü tebilemba lir. 10 ben tashi Chief Minister inyaksang Kumar aser NDA candidate pezüi March 17 nü Rajya Sabha election nung takok ngua liasü. Kumar-i Bihar CM menden nungi anentsü sangdongba sülen March 5 nü nomination paper file süa liasü. Iba mapang nungji pai, "Ni mapang talangka nungi Bihar Legislature aser Parliament House anaprongla nung züingsem kümnüa liasü," ta metetdakja liasü.

West Bengal nung BJP-i sorkar akümtsü: BJP Tir Nitin Nabin

New Delhi, April 09 (Agencies): Brihostibarnü BJP national Tir, Nitin Nabin-i, par party-i West Bengal election nung tang mezüing takok ngua sorkar akümtsü, ta metetdaksü. West Bengal nung April 23 aser April 29 anogotem nung assembly elections agitsü. Nabin-i, 2021 küm West Bengal state assembly election nung BJP jenjang tera junga aküm; 2016 küm party-i menden 3 dang angu saka 2021 küm nungbo menden 77 tashi nung takok ngua liasü aser vote shilem 38 angu, ta metetdaksü. Interview ka nung jembidang Nabin-i, "Atangji onoki yangji sorkar akümtsü. 2016 küm Bengal nung onok koba jenjang nung liasü? aser 2021 küm nunga koba jenjang nung liasü? Ajisüaaka onok jenjang tajungba-tajungba dang kümdar aser vote-a shilem 38 tashi ngutetogo. Bengal nung BJP tera-yanga tashitaitba

kümdar," ta ashi. 2021 küm BJP-i menden aika nung takok ngutetba ajanga tangbo Bengal nung chief minister Mamata Banerjee aser lai aniba Trinamool Congress (TMC) atema tongti opposition ji BJP kümogo. Ajisüaaka TMC toktsür BJP nung adenertem densema BJP MLA tem aikati election sülenbo TMC dangi meyipa liasü. Iba dak alia West Bengal nung 2024 küm Lok Sabha election nung BJP menden-a 12 dang aküm; küm pongu tejaklenbo 18 liasü. West Bengal nung assembly elections agitsü jakdang Election Commission-i Special Intensive Revision (SIR) agia liasü, aser iba mapang nungji voters lakh 19 tenüing agien. Trinamool Congress-isa EC-i state nung ketdangsertem aser IPS officers transfer sütsüba anema ola adoker. TMC-i, ketdangsertem transfer sütsüba

ya BJP aser Election Commission na tsüingda tangatetep nung inyakba lir, ta aitsü. SIR dak sendakba nung Nabin-i, "Nenoki ozüing alema bendangertem Bangladesh nungi anir arura onoki iba tebilemtsü onük süoka jembitsü. Onoki tim masüba nung nisung kar tenüing agien asü? Ajisüaaka Bangladesh nungi ozüing alema arur kari danga tim masüba lenmang ajanga senso agitsü merangra onoki ibaji anema inyaksü. Tarutsü nung item ama maparen aika inyaksü," ta metetdaksü. "Mamata Banerjee-i shisa mebulutsüla. Onoki Bengali nungertem anepalutsü. Tang tashi nungbo lai Bangladeshi nungertem atema dang tebilemtsü katsür," ta pai ashi. 2011 küm Banerjee leniba nung TMC-i sorkar küma liasü, aser parnoki tang agi pezübenbuba medangdangi sorkar akümtsü meranger.



April 09, 2026 nü Kerala yimtiba, Thiruvananthapuram nung BJP lenir aser Kazhakkootam constituency nungi NDA candidate, V Muraleedharan aser pa kinungtsü nati vote agütsüba sülen tangokba noksa nung angur.



TIR YIMYIM YIMOBILEM (EDITRIAL)

DIMAPUR FRIDAY, APRIL (RONGCHII) 10, 2026

Election junga temtetogo

Mapa ajak nung tetenzük ya kanga tongtibang, kechiyong junga tenzüktebaji tesadang kabo takok amai ta shin o jembir aser aji kanga shitak lir. Ajisüaka, aiben junga tenzükaka mapa aika junga metemteter aser mapa ajak nung koma tenzük ta asüba dang nungi koma atem ta asüabajisa tongtibangba lir. Aji oda, junga tenzükaka junga metemtetra, aji tamagitsü saka junga metenzüketyonga junga tembangtetra, tagitsüjibo ajidang asütsü. Ibaji bilemdanga, Koridang bye-election agiba osang angadang dang, tesem ajak nung kecha mepetmesü aser timtem lendong mali election agia tembangba osang angashidang, yashi yakanü tashi election nüboyimba mapang lendong timtem aser asü-ama takoksa tulu atalokba ajanga asenok ajak shisabolua aliba tia nungi mulung anisüngzük tulu nguogo. Atangji, election mapang tim masüba mapatem inyakba ajanga lendong tulu alokbatem agi asenok ajak alima tsüngdang tejak metenteti liogo, aji mapang süia aodang asenok tangatetba tajung arua aneptsü imlar. Ashiko, asenokibo alima nung kin ka nüchi küma aienba ya tim masübalen nungi asüyonga takok anguba aser takar akümba mapatem agi asadanger amai bilema alitsüa akok, ajisüaka itemjibo kin ka nüchi küma aienba tamaitüsü masütsüa akok, kechiyong takokbo shirurutem rongnunga angur aser shirurutemia pei agitsübo bendenteter. Aji oda, asenoka sang, tangar kintema sang, alima nung nübortem aienba ya ki tajung nung aliba, chiyongtsü tajung den chiyongba mesüra süoshi tajung semer gari tajung nung senzüba agi asadanger masü saka ozüng raksatsü arendakba, tim masüba mapatem inyaktsü akseta bilemba aser tangar timtem nung yaritetsü akokba nübo aser mapatem agi asadanger. Iba denji kodang nübortem shisa tenük lapoka lokti aser yimten nung pei temeten inyaktsübaji khuretsa bilema shilem agidir, iba jagi item nübortemji nüchi küma intetogo ta asadantetsü. Asenoki aiben election nung shilem magibaji mesüra vote enoktsüi maobaji nisung tajung aser teindang asüba agi ta bilema alitsüa akok, saka election nung pei vote enoktsüi maoba aser shilem magibaji, nisung tain shisatsü adenba nüchi senso ka masü . Tanü tashitemetet lima nung nisung ka nem senso temeten agütsüba jenjang tematibaji, pei lima nung yimten yimsüsür shimtsü asoshi temeten agütsüba "Voting right" ya lir. Iba dang nungi tuluba yimten nung senso ka asoshi tashi mali. Iba tashi yagi yimsüsür ka shimtsü aser yimsüsür ka agientsü, ibayongji dang yimsüsüri 'voting right' alir senso ka nüken tsübur. Ibaji kodang asenoki angatetdir, asenok shingaia tangar vote mezüngmeshi masütsü aser tangar nema asen vote mezüngmeshi mesüdaktsütsü. Atangji, asenokbo tangang nisung küma nüchi dangi arur asünungji, asenoki asen nem agütsüba yimten temeten 'voting right' jenjang memetet ser tayoka yokogo aser terakzuka rakzükogo. Aji dang masü, asenok aikati asenok nem agütsüba yimten temeten aser tashiji memetet ser election nung shilem magii aruogo. Iba jagi asen lima nung asen alidak asenoki mulungba nung yimsü asütsü melen tangar nem parnoki mulungba nung yimsü sädaktsü dang asenoki meteta aser memeteti asenokbo asen lima nung sensoa masü ama kümadokogo. Ibaji yimten nung asenoki asen temeten meteta mamshiba ajanga lir. Joko, tangbo asenoka election aiben ajangshir aser election agi shia temelenshi balala arur. Ashiko, item temelenshitemji tajung dang nungibo tamajungang teimba asütsüa akok. Joko, tanübo asenoka item tatalokbatem nungi asen temeten timi amshitsü nungdakbatem angazüka arudar asütsü imlar. Aji oda, tang Koridang bye election nung, tesem ajaklen nübortem timi tarensena nokdaker pei vote pei agütsütetbaji asenok ajak asoshi temelenshi tajung ka tenzük asütsü. Atangji, election agiba anogo nung pei vote enoktsütsü asoshi lokti tarensen nung anogo piyong nokdaker atatsübaji mapa tasak lir. Ajisüaka, asenoki anogo kata nübo magütsü aser timtem terakata magi ser asen yimten tajung aser takang küma meyangertetsü. Atangji kenlirbo, kidang nungi dang ayongayonga online nunga vote agütsütsüsa mapanga arutsü, ajisüaka tang atemabo election nung pei vote peisasa agütsütsü asoshi anibelem arema nokdakbaji yimten yangerba nung asen tenla asütsü. Iba tangatetba nung election nung asenok ajaki timi shilem agitsü yongyaa atadi.

OLEMSABANG

ASEN MEKÜTA MAPA TAJUNG INYAKTSÜ WADANG AIKA LIR

~ L. Kika Pongener

Tanü asen lima nung mongdang-mongji, lokti-senden aser sentep-senji ajunga nung; tongti o jembir, tajungshi, tepela aser tayongzükba o jembir ajaki mapa tajung inyaktsüba indang jembir. Tsüngrem lartem-ia tenla kidang tekülem sentep nung; pulpit nungi mapa tajung inyaktsüla ta mapang shia jembir. Minister aser MLA-temia yimjak nung mapang shia mapa tajung inyaktsü aser terenlok mapa inyaktsüba indang yimyim ayimoktsür. Atangji, asen lima nung mapa tajung inyaktsüba indang o agi jembiba amai shitakba mapa agi inyak asübo; asen lima ya kodak lima amai sentsüperanga yangluteter aser menokpanger alitsüba ta aiben shisadanger. Asen Naga lima ya mapa tajung inyaktsüba o agipo kanga bulua jembiba lima ka; saka shitakba (Reality) nung mapa tajung agibo kanga anung-akongba lima ka lir. Atangji, asen Naga lima jila, yimtsüng aser kinuk-kisang ajungalen reprangdanga ora; tesem aika nung kilentsü taolen maka; kilentsü (Nala) junga sadema maliba agi lenmang ajak raksar; lenmang ajunga küm aika meyanglui senzüka yutsüba agi tejaja majung ayong amai kümdoker. Sorkar mozü ki aser school-tem reprangdanga; teimba ka kanga mejungi raksar aliba angudang nubur aika kanga temulung shiranger. Anungji asen lima ya o agi jembiba aser mapa na khenyongi meputepba lima ka lir.

Asen Naga lima nung kechiba lenmang aika nung kilentsü (Nala) mali tzü taolen mali tim-atemer (?) ta teraji bushidangra....Asen Naga nung dak nuji shisatsü (Civic Sense) ya nisung teimba ka dak mali; kilentsü aotsüsa tawa tilaka lira ibaji meru-merua atsü (Fencing) agi atsübanger; lenmang tera sadema alinung; ali kiburtemi lenmang anatsülen nungi meru-merua atsünga arua agir. Ibajagi, asen lima nung lenmang ajak mesu-mesur; aser kilentsü maliba agi tzü taolen mali lenmang ajak raksar. Manganutsü mali, asen Naga nungbo Tsüngremlar-tem, missionary-tem, arogo nung tenzükertem, counsellor-tem teimba ka meru-meru tasüba; takar-tulurtem aser sensaker-tilartem-ang teimba meru-meru tasüba....Ibajagi asen lima ya majunger, merenloker, tejakleni maor aser raksar. Yim lenmang main road, sector road, colony road nung; lenmang anasa shiruru metsüba ki aser latrine ongken yangluba agi; teshinem menemba agi nuburtem tesenzü majung...Hau-niii...Ner li nung ner meyong yanglurji shinga-ia kecha mashitsü; saka asen sasa angateta awashi meteta inyaktsü tim. Ajisüaka, aikati awashi memeteti inyakba agi asen lima ya menendaktsür aser majunger.

Ajak dang alia, sorkar-i nubur anisungdaktsütsü asoshi terenlok mapa tajung inyaktsüba ali tawa tesem kar nung wazüka yura; Tatishitsü agi....Asayadak moapu (Play Ground/Stadium) yanglutsü ali tesadem wazüka ayuba; sorkar Department ki-o-jen yanglutsü ali tawa wazüka ayuba; School, College, Hospital yanglutsü wazüka ayuba; Train Station ulushia yanglutsü ali tawa wazüka ayuba; Air-Port ulushia yanglutsü ali tawa wazüka ayuba....Ibala ama sorkar-i ali wazüka ayuba ali tazüng aika nuburtemi meru-merua atsünga agia alitsü akok. Ashiko, tanga jila nunga aser tesem balala nunga; nuburtemi sorkar ali atsünga agiba aika alitsü sudi. Tang Dimapur Air-port ulushia yanglunur; saka ali atsünga agiba agi tetsükdaktsü ajurur; Tang Dimapur Train Station ulushia yanglunur, saka ali atsünga agiba agi tetsükdaktsü ajurur. Dimapur jila nung tesem ana-asep nung sorkar meyong ali tazüng aliba nuburtemi jakdak-jakdaka meru-merua atsünga agiba ajangshia ngua aruogo. Ibaji jungjunga shisadanga....Nashi-i pei sasa pei semtu kilem attsüzüka mejakba mesuka lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Rajasthan nung Khristan school ka shibangtsüsa akümer



Rajasthan nung Dungarpur district nung ketdangsertemi St. Paul School mita aodang tangokba noksa nung angur.

April 09, 2026: Rajasthan state nung Hindu yimsü alia amangertemi mapang talangka nungi Khristan school ka dak tenük yoka aruba sülen taoba hopta iba school license thinentzüba ajanga iba school shibangtsüsa kümogo.

Iba school nungji tanurtem dang Khristan yimsü dangi meyiptsü ajungshir aser inyakyim aika meshidak liasü, ta tai tongloktsü.

Rajasthan nung Dungarpur district kübok Patela nung yaküm September ita nungi tenzüka right wing teloktemi St. Paul School dak tenük yoka liasü.

Hindu yimsü alia amangertem aser tsüraburtemi yaküm school kima longkak aitba mapang nung district educational ketdangsertemi St. Paul indang hostel nung merükmeju mali, ta shia hostel

ji shibangtsü tuyua liasü. Hostel shibangba ajanga kaketshir 230 takoksa angu.

Tang tesüsa district educational ketdangsertemi iba school mita aoba sülen school license-a thinentzüogo aser tang tezüngdakpurtem dang tanga school-i oang ta tuyu.

Osangbenertem den jembidang St. Paul school ketdangsertemibo, tang tashi nungbo school shibangtsü tetuyuba agüja mali, ajisüaka iba tetuyubaji anema onoki court nung ken o benoktsü ta metetdaksüogo.

Elementary Education Director-i school license thinentzüba sangdongji tim departments and aser National Informatics Center (NIC) nema agütsüogo.

Iba school nungji tanurtem Khristan yimsü dangi meyiptsü ajungshir, ta kari tai tongloktsüba

nung ajemdaker iba school anema tenük yok tenzüka liasü.

Meimchir temeden atema inyakba telok Citizens for Justice and Peace (CJP)-i ashiba agi, yaküm September ita nungi tenzüka Khristantem anema inyaksü ajungmeshir; talisa state nung Rajasthan Prohibition of Unlawful Conversion of Religion Bill, 2025 agizükba sülen nungi Khristantem anema inyaker, ta metetdaksü.

WhatsApp group balala nung 'Khristantemi tangartem Khristan yimsü dangi meyipdaksütsü meranger' ta osang prokshiba nung ajemdaker right-wing local units-i Khristan schools aser hostels anema inyaker.

Rajasthan kübok Alwar, Anupgarh aser Jaipur district tem nunga item ama tatalokba aika lir.

Pakistan nung police-i Khristan ka reshikangshia tepset

April 08, 2026: Pakistan nung police-i tanur pezü tebu Khristan ka apuba sülen ghonda ishika tsüngda reshikangshia tepset, ta kinüngertemi metetdaksü.

Lahore yimti kübok Sadhoki Kahna Nau area nung police-i Khristan, Iftikhar Masih asübaji pasasa soseta asüba ama sayutsü meranga 'ceiling fan nungi sü kati alenseta sür lia angu' ta ashi, ta par adianu Riyasat Masih-i metetdaksü.

Iftikhar Masih ya arrshi küm 42 liasü. Pai tanur ka puer aotsü merang, ta pa nem tai tonglokja police-i apu.

March 26 nü Iftikhar Masih kinüngtsüi la kinüngbu nungi phone call ka agizük, ajisüaka police officer kati ang jembia liasü, ta Masih-i ashi.

"Iftikhar-i private housing society nungi tetsür ka puer aotsü merang, ta shia la dang Industrial Area Police Station Kahna post-i arung ta metetdakja liasü," ta Masih-i ashi.

Idangyongjisa par adianu

police post jagi aoba sülen police officer Mohsin Shah ajurua liasü.

Shah-i Masih dang, tang tashi nungbo First Information Report (FIR) mebenok, ajisüaka iba ken o ya bentettsü akok ta ashi, ta paisa metetdaksü.

Riyasat Masih-i, "Shah-i kü adianu chioktsü atema kü dang sübokrem sen 200,000 (US dollar sen 720) meshi. Ni pa dang, ozü adianu aibelen masü aser pa nisung tajung ta ashi. Ajisüaka Shah-i maneni sübokrem akhang. Anungji senji anepalutsü atema ni ao aser ghonda ishika lir meyiapa arudangbo pa soseta süogo ta kü dang ashi," ta metetdaksü.

Masih-i, police-ibo ozü adianu pa sasa soseta asü ta ashi, ajisüaka pa temang nung yiruba zübo aika keta liasü, ta metetdaksü.

"Ni hospital aiben semdangogo aser police office-ia ogo saka tang tashi post-mortem report kü nem

magütsür," ta paisa metetdaksü.

Iftikhar Masih ya University of Lahore nung atsüki anepaluba mapa inyaka aruogo.

Iba osang prokba sülen Khristan 300 shi police station kima adenshir longkak ait aser ghonda aika gari lenmang nokdanga liasü.

Provincial yimsüsür Khristian, Falbous Christopher-i police tongti ketdangsertem ajurua aibelenertem nem temerenshi agüjang ta tuyuogo.

Police-i Shah anema FIR ka benokba sülen ang Khristantemji senshia liasü.

March 27 nü Iftikhar Masih asüpila sentong nungji nisung noklang aika aden, aser ibaji ajanga pai akümüli mapang nung junga aliba kuli sayur, ta Masih-i ashi.

Tang alima nung Khristantem alitsü atema linük tamajungtiba 50 rongnung Pakistan ya jenjang 8buba nung lir (Open Doors 2026 World Watch List).

ANOGO ABEN TSÜNGREM DEN

Temeimi tashi angaba bener arur

Shiba den kü ozüng lir, aser aji benshir pai ni meimer: aser shibai ni meimer kübui pa meimtsü, aser ni pa meimtsü aser ni küsasa pa dangi jungkai adoka sayutsü. Yohan 14:21

Tsüngrem ozüng meimbaji ne mulungjang nungi adoker. Kodang nai Tsüngrem dang tashi angatsü timtemdir, ibaji ne mulungjang Tsüngrem nungi pilaba tamaittsü lir. Kari ashir: "Ni Tsüngrem meimer, saka dang tashi angatsü timatemer." Tanelaren ibaji tamakoktsü. Kari ne dang "Nai Tsüngrem meimer asü?" ta asüngdangra nai yakta langzütsü, "Au ni meimer." Ne dang, "Nai Tsüngrem dang tashi angadir ma?" Nai au ni tashi angar ta langzütettsü asü? Temeja Tsüngrem meimbaji temulungjang ajunga agi Tsüngrem dang tashi angaba dangi anir. Nai nübuttsü dang mapang mapang nung meimra, ne tesendaktepji shidak masü. Tesadang meimba aser tesadang tashi angaba Tsüngremi magizüker.

Temeim medeni tashi angabaji ozüng mapa lir. Pei atema dang tashi angabaji pei sasa tabensa akümba, koba agi asüküm dangi anir. Tekümdang Khristantem Khrista dang tashi angaba dang nungi parnok taküm nung tazüokba akatsü meranger. Tazüokba jagi Tsüngrem meimba mendenji agitsü makok. Tsüngrem ne temang meshia aliba, ne moral libaliro aser na arogo mapa nung shilem agiba atena oa ne mulungjang repranger.

Ne tekülem tazüngla aser mapang ataktetta ayuba tekülem ka dang akümer asü? Tsüngrem O azüngba metetta arur asü? Ne sarasadem waluk watemba ka dang akümer asü? Idakji ne mulungjang Tsüngrem nungi melenshiba tamaittsü lir. Temeimji Tsüngrem den telungjem akatsü aser Pa tenzüktsü asoshi jangradaktsüba tulutiba lir.

Madhya Pradesh nung police-i nun ana pua asüngdangya

April 09, 2026: Madhya Pradesh nung nun ana par Arogo nung züngsem tetsür ti den külemi ainlen jajaba mapang nung police-i apu.

Nun ana jagi nisung shibelener aser tamangba yimsü meyipdaksür südi, ta tena dak melung melemi railway station ka nung apuba sülen asüngdangya.

Indore nung aliba Catholic Arogo nungi putirtemi tongtepratepa police ketdangsertem den jembiba sülen ang nun anaji chioka liasü.

April 7, 2026 anepdang Indore railway station nung Police-i Sister Tresa Jaya den Sisters of the Visitation Congregation (SVC) nungi nun ka aser tetsür ti dangji ghonda ka shi asüngdangyaa liasü.

April 8, 2026 nü osangbener den jembidang Sister Jacintha-i, "Arogo nung putirtemi mapang shidak nung tongtepratepba ajanga sister ana den sister akümtsü jangrartem ajak chiokogo," ta metetdaksü.

Laisa, tetsürtemji sodi amongtsü atema nun anati meina Odisha-i aoba mapang nung iba ya atalok, ta metetdaksü.

"Parnok Indore railway station tongli police-i parnok apuba sülen parnok dang asüngdangya," ta Indore nung Bishop Thomas Mathew-i metetdaksü.

Paisa, "Nun tem ji kanga tia kar, kechiyong police rongshitsü atema lokti maliasü. Yaküm-a Chhattisgarh state kübok Durg railway station nung Kerala tsür nun ana pua liasü," ta ashi.

Yaküm July 25 nü Assisi Sisters of Mary Immaculate (ASMI) nungi nun ana- Sister Vandana Francis aser Sister Preeti Mary na pua liasü.

Bishop Mathew-i, nisung kari ajioktsür police nem nun anaji pudaktsü, aser ibaji tejangja, ta ashi.

Mathew-isa Arogo nung lenirtem aser nun tem dang sodi mapang ainlen senzüdang kanga kumdangtsü metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Warowaror

(n) tobur jungjunger, tereprangnüsüka (cute)

* Aotsürbo ajak warowaror angur.

Wasa

(v) tilala küma rangsa (slice into small pieces)

* Shi tilala wasar asobasa tajungba achir.

OLONG PAITEP # 7469

1					2				3
							4		
5		6			7				
8									9
							10		
				11	12				
		13							
14					15				
				16					

TIPIEN

- 1. Ojembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüc asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjildong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 7468 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kioktsü, 17. Itsük,
- 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER



Nagpur, Maharashtra nungi arishi küm 17 tain tzüwar Ishwari Kamalesh Pande-i otsü tasen ka yanglua pa ya tenük tapok tzüwartem rongnung Palk Strait wadanga aoba mezüngbuba tzüwar kümogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Aizawl civic polls: ZPM-i merük merüka yimsü asütsü nangzük

Aizawl, Rongchii/April 9 (Agencies): Aizawl Municipal Corporation (AMC) elections agitsü lia Mizoram nung tang sorkar kümteter aliba party Zoram People's Movement (ZPM)-i parnoki election kokra merek merüka yimsü asütsü tenanzükba agütsüogo. Iba election ya April 21 nü agitsü.

Iba civic polls ya state nung yimden yimsüsüba tsütsü kanga tongtibang ta züngshir, kechiyong state nung 2028 küm Assembly election agitsü lir asünung iba ajanga party tem jenjang yanglushitsüsü.

Nüboyimba sentong nung shilem ka ama ZPM-i Bodhbarnü Aizawl kübok tesem balala nung yimtong nung nüboyimba sentong ayongzüka agiogo. Sentong nung o jembiba mapang Revenue Minister B. Lalchhanzova-i, taoba Mizo

National Front (MNF)-i aniba municipal administration aitsü aser ashiba agi, AMC ya yimden yimsüsüba tsütsü tajangzük angutsü atema contract lemtsüba centre ka kümogo.

Paisa, ZPM nem AMC yimsü asütsü maongka agütsüra parnoki senotsü ochi shia amshitsü nangzükba den temzüng ozüing dak ajemdaker terenlok maparen benoka inyaksü atema Ward Committee tem dak rangloker inyaksü, ta ashi. "Municipal body ya nüburtem ajak longjemer yimsüsütsü asoshi sabang ka ama senotsü dak sendakba ken o nung ochi shia inyaksangshitsüla," ta pai ashi.

Kasa mapang nung Forest Minister Lalthansanga-i ashiba agi, saru dak sendakba nung tang administration dak nüburtemi tamang kateta

kümogo, kechiyong senotsütem ochishia amshidar. Paisa, party-i municipal body kümtetra AMC-i saruba sarutem ya nüburtem ajangzüktsü atema amshitsü, ta ashi.

Finance and Planning Adviser to the Chief Minister aser MLA TBC Lalvenchhunga-ia, nüburtemi sorkar dak tali tamang kateta aoba indang lemsatepogo aser tatishitsü ka bener arua ashibaji, nüburtemi terenlok maparen balala atema ali asoshi temenok memeshi-i tenla agütsüdar.

Ajak senteper candidate 68 AMC election nung tokteptsü, kong tetsür 28 densema lir. ZPM, MNF aser Congress nunger-i candidate tertekuku nominate süogo aser BJP-i candidate 11 nominate süogo. Vote ya April 27 nü azüngtsü.

Democracy kümzüktsü atema voter tem arur: Akhil Gogoi

Guwahati, Rongchii/April 9 (Agencies): Raijor Dal tir Akhil Gogoi-i Brehostibarnü ashiba agi, Assam nung voter tem democracy kümzüktsü aser fascist BJP sorkar atsüngtoktsü atema aika vote agütsü arur.

Vote agütsüba sülen osangbenertem den sensaksema mapang Gogoi, shiba Sivasagar constituency nungi tanaben tokteper pai state sorkar aitsü aser opposition-i taruba sorkar kümtettsü ta temulung lema bilemba lemsatep.

undemocratic sorkar kati anir. Iba ya fascist sorkar ka lir," ta pai ashi.

Paisa, BJP dak temulung masüba ajanga nüburtem vote agütsü arur ta ashiba den opposition-i iba election ayong ayonga akoktsü ta temulung lema bilemba lemsatep. Gogoi-isa pai Sivasagar menden ya vote 50,000 dak tema agi akoktsü imlaba lemsatepogo.

Sivasagar constituency nung candidate asem toktepa liasü. BJP-i taoba MLA Kushal Dowari yok aser parnok den

sendaka aliba party-i Amguri MLA Prodip Hazarika yoka liasü.

Assam nung taküm election ya anogo ka nung dang agiogo, koba 2021 kümbo shilem asem küma lemsar agia liasü. Taküm vote agütsütsü atema nisung crore 2.5 dak tema temsüa liasü.

BJP-i aniba telok tang agi term asemubaba state yimsü asütsü atema merangdar, aser kasa mapang nung Congress-i aniba opposition bloc-a 2016 küm sülen tang mezüngbuba sorkar kümtettsü merangdar.

Before You PACK Your LUNCH BOX

Make Sure You've Followed These Tips.

Choose lunch boxes in simple shapes, which can be cleaned easily.

Wash, Clean, and Dry lunch boxes before using them.

Cool food items before packing them to prevent steam build-up in the box.

Never use newspaper or any other kind of ordinary paper bags to pack food.

Pack Smart, Eat Smart !

State Food Safety Authority, Department of Health and Family Welfare, Govt. of Nagaland.

Israel-i Lebanon amakba ajanga jembishinü amajok akumtsü: Pezeshkian



Tehran, Rongchii/April 09 (Agencies): Tang tesüsa Israel-i Lebanon amakba Iran Tir Masoud Pezeshkian-i aitsü aser iba ya tang aliba ceasefire agreement nung aibelenba lir ta ashi.

Social media post ka nung, "Israel-i asendenshir Lebanon linük telung nung tashiyim amshiba ya ceasefire agreement tetenzük nung aibelenba lir. Ibai ashioxtsüba yimya tamajung ka lir aser tezüngzüktep tem agitsü atema temulung magütsüba lir," ta Pezeshkian-i ashi.

Mitkar temi tanen makai amakba ajanga yimjung asoshi meranga inyakba nung timtem ajurutsü aser tanen makai item mapa inyakba ajanga jembishinü amajok akumtsü, ta pai ashi.

Iran tiri Lebanon bhukuma tekum dangtsü tesashi agüja, "Ozü temeyong trigger nung lir. Iran-i kodanga Lebanon nung

adianu aser adianutsü senzuka metoktsütsü," ta ashi.

Iba dak sendakba sangdong ka nung pai tensa ya tanen makai tashiyim amshiba ama rateta ashi aser "Zionist entity-i Lebanon anema tanen makai tashiyim amshiba ya mezüng ceasefire agreement nung aibelenba lir aser tangatettep kati arutsü asoshi jembishinü inyakba ashioxtsür ama lir. Iba ama tanen makai tashiyim amshiba ajanga jembishinü amajok akumtsü."

Region nung tensa mejungi akumba mapang ka nung iba sangdong ya agütsür, kong ceasefire asoshi meranga inyakba aser Middle East nung tashi ita alitsü asoshi tebilemstü akar.

Iranian Parliament Speaker Mohammad Bagher Ghalibaf-ia ceasefire nung aibelenba atema timtem alitsü ta tekum dangtsü ashi.

Social media post ka nung,

"Lebanon aser Resistance Axis ajunga Iran indang tembar aser ceasefire nung pilatsü makokba shilem ka lir. (Point 1, 10-point proposal)", ta Ghalibaf-i ashi.

Pai Pakistan Ato Kilonser Shehbaz Sharif-i jembiba o athishia, "PM Shehbaz Sharif-i yimjak nung jangja-jangja Lebanon ken o shiogo; aji sendoktsü mesüra senzuka yutsütsü kecha mali," ta ashi.

"Ceasfire nung aibelenba nung takoksa tulu lir aser telangzüba tesashi agütsütsü. Mi tangsa remsepan," ta ashi.

Israel-i Brehostibarnü Lebanon nung maneni amakba ajanga West Asia nung ceasefire tebilemstü tamajungba akumer.

Israel mitkari Beirut nung amakdang personal secretary to Hezbollah Secretary-General Naim Qassem, Ali Yusuf Harshi tepsetogo ta ashi.

X post ka nung, "SAMATSÜOGO: Ali Yusuf Harshi, Beirut nung Hezbollah Secretary-General Naim Qassem indang personal secretary," ta ashi.

Harshi ya Qassem den tesendaktep tajung lir aser personal advisor liasü, shibai Qassem indang office ketdangsuba nung tongti shilem agir, ta post nung ashi.

Israel Defence Forces-i Beirut kisung nung masü Hezbollah indang noknü belenshiba aser rizünga ayuba tesemtem nunga amak ta ashir.

US sepaitem Iran anasa alitsü: Trump

Washington, Rongchii/April 09 (Agencies): United States Tir Donald Trump-i US sepaitem Iran temeket nung alitsü ta ashi aser Washington-i ahangba ama Tehran-i meinyakra mitkar temi mera tesashi agitsü ta amokmeren.

Bodhbar aonung menur social media nung, "REAL AGREEMENT" ajunga mapa kuma meinyak tashi US sepaitem, aircraft aser naval forces tem renema alitsü, ta Trump-i ashi.

"Chichiba tezüngzüktep ajunga meinyak tashi US rong, tayimtsü aser mitkar ajunga Iran meketa alitsü," ta Trump-i Truth Social nung zülü.

"Kuli kari danga yamaji mesüra... 'Shootin' tenzütsü, tuluba, tajungba aser tashi taitba tesüba mapang shingai mongudangi aliba ama."

Pakistan tetsüngtai ia Washington aser Tehran tsüngta hopta ana atema ceasefire sangdonger anogo ka dang lir pai iba sangdong ya agütsü. US aser Israel nati hopta trok Iran amakba ajanga Strait of Hormuz nung rong tem senzüsempongba nung tenokdangba agüja alima ajunga tebilemstü agi sünger liasü.

Ajisüaka Trump indang o yimya ajanga khen rara anena ataba kera raksatsü ama angateter. Iran-i nuclear noknü mangdang yutsütsü aser Strait ajanga rong tem timtem majurui senzüdaktsütsü US-i ahangba pai nenshia ashi aser US sepaitem renemer anisüngzüka lir, ta ashi.

Kasa mapang Iran nung semiofficial ISNA aser Tasnim news agency ajanga Brehostibarnü adokba nung par linük indang paramilitary Islamic Revolutionary Guard Corps (IRGC) ajanga rara mapang Strait of Hormuz nung sea mines yuja aliba indang chart ka agüja liasü. Chart nungya Traffic Separation Scheme kübok Farsi nung "danger zone" ta lungbanga liasü, koba strait ajanga aoba mapang rong temi amshiba lenmang ka lir. Iba ya February 28 nungi April 9 tashi indang lir aser IRGC yagi iba lenmang nung mines yuja aliba ya agien asü masüar mejangja.

US-i tanen makai amokmerena aser Iran-i region

nung military campaign agia alidang ceasefire ya talangka alitsü asü masü ta Iran nungeri bilemer.

"Anogo ka danga nisung metepset aser azüdokshi mesüi süyira, aji kanga tajung asütsü. Ibaji ajanga onok pelatsü. Tsüngrem tenüng nung ashir, ni yamai tepsetba angudang, ni kanga jashi, ni ozü kidanga melitet," ta tetsür kati osangbener dang ashi.

Nisung katibo khen asoshi rara anena ataba ya magizükteti Israel-i tanen makai Lebanon nung bomb pokloktsür ta ashi.

"Ozü lenir tepseter aliba ano meremet aser rules of war nung tang tashi aibelener alinung, ceasefire tetetzü kecha mali."

Ano nisung kati iba ceasefire ya Trump indang asayamenü ka dang lir ta ashi. Onoki iba ceasefire nung mamanger.

Ceasefire nungya mangatettep agi sünga lir.

US proposal aika Tehran-i magizüker aser paria par takhangba agütsü aser yangji Israel-i Lebanon amakba anentsü aser sanctions tem agentsü dena lir, koba Washington-i magizük.

Tensa mejangjai liaka Iran ketdangsurtem US lenirtem den jembishinü akatsü atema Islamabad-i aotsü renemtar.

Iran ambassador to Pakistan Reza Amiri Moghadam-i Brehostibarnü X post ka nung "Iran-i agütsüba points 10 nung ajemdaker jembishinü akatsü atema delegation ka taonung Islamabad-i arur," ta ashi. Ajisüaka pai mapang tatsüka lir iba post ya delete asü.

Pakistan yimtiba nung aliba ketdangsur temi ajungbena anogo ana holiday alitsü Bodhbarnü sangdong aser kuli kecha magütsü.

Kasa mapang US nung rara anemer tali akumer. Senator Cory Booker-i ashiba agi, Democrats temi War Powers Resolution kübok temelaba makai mitkar inyakyim anema vote agiteptsü ta ashi.

"Trump-i temelaba makai mitkar inyakshangshi aser tapi agi raranüba anendaktsütsüla," ta Booker-i ashi. "American nüburtemi (iba rara) maginer aser memela, saka yamaji süaka taa maneni agütsür."

Greece nung arishi küm 15 tekübok alirtem social media mamshidaktsütsü

Athens, Rongchii/April 9 (Agencies): Greece nung 2027 küm January 1 nü nungi arishi küm 15 tekübok aliba tanurtem social media amshitsü memelatsü, ta Ato Kilonser Kyriakos Mitsotakis-i Bodhbarnü metetdaktüsü. Pai, anxiety agi timtemba tali akümba, junga memejangba tebilemstü aser online sabangtem addictive design amala kuli tem asadanger iba jenjang agir, ta ashi.

Video osang ka ajanga Mitsotakis-i ashiba agi, tanurtem screen tem nung mapang aika entoker aser iba ajanga parnok tekelok anisüngzüksü mapang mangur aser online nung tangar den medemdangba aser online comment tem ajanga parnok tali nongshir.

Greek Ato kiloner yagi, pai tsürapur aika den sensakemogo aser parnoki parnok chirnurtem junga memejangba, mela mela mesüngjemteti shisabulua akümba aser screen nung mapang talanglang entokba tebilemstü lemsatepogo, ta ashi.

ALCO-i opinion poll ka agiba koba February ita saya-a liasü, iba poll nung shilem agir shilem 80 shi-i tanurtem nem social media mamshidaktsütsü atema pusemogo. Greek sorkari school tem nungbo mobile phone mamshitsü atema tenokdangba agütsüogo aser

tanurtem screen nung mapang talangla mintoktsü atema parental control platform tem amenokogo.

"Iba amala jenjang agiba linüktem rongnung Greece-a mezünpur asütsü," ta Mitsotakis-i ashi. "Ajisüaka iba ya tatembang masütsü ta ni bilemer. Onok nükjidongji European Union nema iba jenjang agidaktsütsü atema nongshitsü asoshi lir," ta pai shisem.

Alima nung linüktem rongnung Australia-i mezüngbuba tanur arishi küm 16 tekübok alirtem nem social media mamshidaktsütsü atema tenokdangba agüja liasü. December ita Australia sorkari TikTok, Alphabet's (GOOGL.O), YouTube aser Meta's (META.O), Instagram aser Facebook nung amshiba nokdanga liasü.

Meta, Snapchat aser TikTok nungeri ashiba agi, Australia-i tenokdangba agütsüba ajanga lanurtem kümzüka meyutettsü, saka iba tetuyuba sülen tashi anga anidaktsü asoshi parnok bendanga agütsür lir ta ashi.

Tanga linüktem nunga social media dak sendakba nung temzüng ozüngtem akangshidar aser the United Kingdom, Malaysia, France, Denmark aser Poland nunger nunga tenokdangba kar agütsüogo

aser tenokdangba agütsütsü asoshi tang jenjang tagidak lir.

European Commission tir Ursula von der Leyen dangi yokba shiti ka nung Mitsotakis-i, European Union-i longjemer jenjang agitsü ayongzükgogo, aser ashiba agi linük ka kijai jenjang agiba ya tanurtem internet addiction nungi pila lidaktsütsü asoshi teperi masütsü.

Shiti nung pai EU kübok aliba linük ajunga nung digital küm ya 15 nung atakzüka ayutsü benokdangba den, bloc dang 2026 küm tatem tashi nungbo longjemer inyakyim ka benoktsü mepeshia metetdaktüsügo.



April 09, 2026 : Anogo ka tejakdang Israel-i Lebanon yimtiba Beirut nung tayimtsü amshia amakba sülen tangokba noksa ka nung gari teraksa tem angur. Lebanon Ato Kilonser Nawaf Salam-i Brehostibarnü, April 9 ya linük mangyimba anogo asütsü, ta Bodhbarnü sangdong. Bodhbarnü tashinung Israel-i Lebanon tesem balala amakba nung nisung 254 tepsetogo aser 1,165 yirutsüogo ta Lebanese Civil Defense ajanga ashir.

Badminton Asia C'ships: Sindhu tsükogo; Ayush-i takok angu

Rongchii/April 9, 2026 (Agencies): Ningbo nung tang asaya aliba Badminton Asia Championships nung Brehostibarnü tetsür kija asaya pre-quarterfinals nung PV Sindhu-i World No. 2 China tsür Wang Zhi Yi mekoki tsükogo.

Iba asaya nung Wang Zhi Yi-i 18-21, 8-21 agi Sindhu ayong ayonga koka liasü.

Tena tsüingda iba asaya ya Wang-i minute 46 nung dang koka liasü. Tang tashi nung tena tsüingda asaya China tsür la yagi pezüben aser Sindhu-i asemben koker lir.

India tsür la yagi taoba round nung Malaysia tsür Wong Ling Ching 15-21, 21-11, 21-19 agi koka liasü. Tena tsüingda ghonda 1 ser minute 7 asaya.

Kasa asayamung tebur kija asaya nung Ayush Shetty-i Chi Yu Jen 21-16, 21-12 agi minute 41 nung kokogo. Pa taruba asaya third seed Indonesia nung asayar Jonatan Christie den asayatsü.

Ayush-i pa tar alangba maongka agia smash tem kanga ajanga azük aser net nunga asaya kanga junga azüoka asayateta pai iba asaya amokbanger asaya.

Tena tsüingda mezüingbuba game bo kanga toktepa asaya aser point 4-4 akümba sülen



Chi-i tajungba asayateta pa 10-6 agi tejakdang aküm.

Break sülen Ayush-i kanga junga asaya-a point 12-12 aküm aser iba sülen pai asaya amokbanger asaya. Kasa mapang nung Chi-i aibelen aika mena liasü.

Iba sülen Ayush 18-14 agi tejakdang aküm aser pai asaya koka liasü.

Tanabuba game nung Ayush-i tetenzük nungi kanga junga asaya-a pa 4-0 agi tejakdang aküm.

Break tashi nung India nung asayar ya 11-7 agi tejakdang liasü, aser iba sülen pai tesülen meyipa merprangi maneni kanga junga asayayonga atu aser asaya 21-

12 agi ayong ayonga koka liasü.

Ajisüaka India nung tanungba asayar atema Brehostibarnü ya tezüdangtsü anogo ka liasü.

HS Prannoy shiba tapu yiruba ajanga masayai lir iba asayamung asaya liasü, pa China nung asayar Weng Hong Yang-i 12-21, 19-21 agi tsükdaksü.

Dhruv Kapila aser Tanisha Crasto nati Malaysia nung tarp Chen Tang Jie aser Toh Ee Wei na 13-21, 14-21 agi makok.

Kasa mapang nung Lakshya Sen, Kidambi Srikanth, Malvika Bansod aser Tanvi Sharma nung ajak mezüingbuba round nung tsükatokogo.

Champions League: Atletico aser PSG nati takok angu

Rongchii/April 9, 2026 (Agencies): Bodhbarnü UEFA Champions League quarter-final mezüingbuba leg nung Atletico Madrid nungi asayar Julian Alvarez aser Alexander Sorloth nati goal kaka idakja parnoki goal 2-0 agi Barcelona kokogo.

Camp Nou nung iba asaya nung La Liga nung temaba jenjang nung aliba team yagi asaya amokbanger asaya liasü, saka Atletico nungi asayar Giuliano Simeone alandaktsüba atema Pau Cubarsi nem red card agütsür tugudaktsü sülen parnok jenjang mejungi aküm.

Iba foul ya box kümbang nung mena aser free-kick agütsüba Alvarez-i metsüa goal kanga junga idakja liasü.

Team ana maneni toktepa asayayonga tur asaya atemtsü minute 20 anunga lia Sorloth-i Atletico atema tanabuba goal idaktsü aser iba ajanga parnok semi-finals-i aitsü atema jenjang junga kumogo.

Diego Simeone-i aniba team yagi iba tetoktepa ya khen danga koka mali. Parnok 2014 aser 2016 küm final tonga asayaogo, saka anabenprongla parnok Real Madrid-i tsükdakja liasü.

Iba asaya makokba sülen Barcelona pur jenjang mejungi kumogo aser taruba Mongolbarnü Madrid nung tanabuba leg asayaba mapang asaya kanga junga akoktsü

nüingdaka lir. Parnoki Champions League ta tatemsa 2015 küm koker lir.

Atletico puri 2006 küm sülen tang mezüingbuba Camp Nou nung asaya ka kokogo.

Kasa asayamung tanga quarter-final asaya ka nung iba asayamung tesüsabuba koker aliba team Paris Saint-Germain-i goal 2-0 agi Liverpool kokogo. Asaya nung Desire Doue aser Khvicha Kvaratskhelia nati goal kaka idakja liasü.

Asaya tetenzük minute 11buba nung Doue-i metsüba ball Ryan Gravenberch dak tsükdaker goalkeeper Giorgi Mamardashvili ajanga ia liasü. Iba sülen Kvaratskhelia-i minute 65buba nung tanabuba goal idaktsü. Iba asaya ya parnoki tetenzük nungi tatem tashi amokbanger asaya liasü.

Liverpool pur tang junga masayateti aruba mapang ka lir aser anogo pongu tsüingda parnok tanabenbuba tamakok nguogo. Taoba hopta tatemi FA Cup nung parnok Manchester City-i goal 4-0 agi koker liasü.

Liverpool puri tetoktepa ajak nung taoba asaya trok nung ka dang koka lir aser tang agi 16benbuba tamakok nguogo.

Team ana tsüingda tanabuba leg asaya Mongolbarnü Liverpool indang ground nung asayatsü, anungji PSG asoshi iba asaya akoktsü kanga melarabo masütsü.

BCCI-i Shubman Gill dang senchi achi



Rongchii/April 9, 2026 (Agencies): Gujarat Titans captain Shubman Gill dang BCCI-i senchi sen lakh 12 achi. Bodhbarnü aonung IPL nung Delhi Capitals akokba asaya nung atakzükja aliba dang nungi mapang taliba agiba atema pa dang senchi ya achi.

Iba ya Gill asoshi tang asaya aliba season nung mezüingbuba aibelen lir. Pa Shreyas Iyer den denogo, shibai iba aibelen anaben menaogo aser Abhishek Sharma-a umpire den asatepa atema merenshiogo.

Iba asaya ya Gujarat Titans puri arierna kokogo. Tatembangbuba over nung asaya akoktsü atema DC pur run 13 nüingdaka aliba mapang Gill-i Prasad Krishna nem ball

ondaktsü aser pressure nung süaka pai DC nem asaya mekokdaksü.

Shubman Gill ya tetsü yiruba ajanga Rajasthan Royals den bo masaya. Pa masayaba mapang Rashid Khan lenisüba nung team asaya liasü. Delhi Capitals den asayatsü mapang tatsüka dang lia pa anema akümba osang metetdaksü aser pa lenisüba nung team asaya liasü.

"TATA IPL nung Capitals (DC) den Arun Jaitley Stadium, Delhi nung asayaba mapang atakzükja aliba mapang dang tali agiba atema Gujarat Titans (GT) Captain Shubman Gill dang senchi chiogo," ta IPL sangdong ka ajanga metetdaksü.

"Iba ya par team asoshi

mezüingbuba aibelen liasü anungji Gill dang senchi sen lakh 12 chiogo," ta kasa sangdong ajanga metetdaksü.

Gill-i kasa aibelen ya taneben menara pa dang senchi anasü agi timba achitsü aser tasembenbuba aibelenra pa asaya ka atema tenokdangba agütsütsü.

Asaya dak sendakba nung asaya atemtsü ball ana anunga lia Miller-i Kuldeep Yadav nem run ka magidaktsüba ajanga iba indang aikati jembidar aser parnoki iba asaya ya run ka agi mekoki liasü. Asaya nung Miller-i six ka azükba sülen ball ana nung run ana nüingdaka aküm. Iba sülen taruba ball nung pai Kuldeep nem strike agütsütsü memulung aser tatembangbuba ball nung tenati run asem saka Kuldeep run out asü.

Asaya nung Titans pur atema Gill-i ball 45 nung run 70 yanglu aser Jos Buttler o Washington Sundar natia half century kaka yanglua parnoki asayar 4 out ser run 210 yanglu.

Delhi atema captain KL Rahul-i run 92 yanglua team jenjang kanga junga toktsü. Parnok rongnungi Miller-ia ball 20 nung out mesüi run 41 yanglu saka parnoki iba asaya ya run ka agi mekoki liasü.

Asian Boxing C'ships nung India tetsür team-i medal 10 angu

Rongchii/April 9, 2026 (TYO): Asian Boxing Championships 2026 nung India tetsür boxing team-i kanga junga asaya-a parnoki medal 10 angu, kong gold medal 4 densema liasü. Team ajak dang nungi parnoki medal timba ngua liasü.

Team nung züingsem ajaki medal kakabosa ngur kidangi meyipa aruogo, aser iba ajanga coach Santiago Nieva kübok team kanga tashi ita akümba aser asayamung ajak nung kasa kanga junga asayaba sayur.

Parnok rongnungi mezüingbuba gold medal ya Minakshi (48kg)-i angu, shibai Mongolia tsür Nomundari Enkh-Amgalan 5-0 agi koka liasü.

Iba sülen Preeti (54kg)-i final asaya nung la dang nungi tajangshiba timba bener aliba Chinese Taipei tsür Huang Hsiao-wen 5-0 agi koka gold medal angu.

Ano Priya (60kg)-ia North Koreatsür Won Un-gyong 3-0 agi koka gold medal angu aser Arundhati (70kg)-i final nung Kazakhstan tsür Bakyt Seidish

4-1 agi koka India asoshi gold medal pezübuba koktsü.

India tsürtem rongnungi ano Jaismine (57kg) aser Alfiyan Pathan (80+kg) natia silver medal kaka ngua liasü.

Gold pezü den silver ana aser bronze medal pezü anguba sülen India tetsür team-i iba asayamung nung medal 10 ngua takok tulu nung iba asayamung tembangogo.

Kasa asayamung tebur asaya nung Vishvanath Suresh (50kg)-i Jorda nung asayar Huthaifa Eshish 5-0 agi koka final-i ai. Sachin (60kg)-ia semifinal nung Thailand nung asayar Sakda Ruamtham 4-1 agi koka liasü.

Ajisüaka Akash, Lokesh, Narender, aser Harsh Choudhary nungeri Uzbekistan, China, aser Tajikistan nung asayar den asayaba asaya mekoktet.

Iba asayamung nung India team-i medal timba angutsü jangjaogo aser tebur final nunga takok tajung angutsü maongka lir.

BILEMDANGANG

"Tangar kar dang na soro majunga ta ashiba agi na soro tajungba mekümdaktsür."